

10. marts 2026

UPA 2026/74

Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Ulluunerani paaqqinnittarfinni meeqqat minnerit toqqissisimanissaat, atugarissaarnissaallu qanoq qulakkeersinnaaneripput pillugu, apeqquteqaat aallaavigalugu oqallinnissamik siunnersuut.
(Inatsisartunut ilaasortaq Pipaluk Olsen, Demokraatit)

Meerartagut minnerit ullup annersaa ulluunerani paaqqinnittarfimminniittarput. Tamanna pillugu ulluunerani paaqqinnittarfik taakkununga pingaaruteqarpoq. Tassani toqqissisimaneq, allannguissuseq, qanilaarnerlu aalajangiisuulluinnarlutik.

Meeraq mikisoq oqaasinnguisinnaanngikkaangami timini aamma misigissutsini atorlugit, avatangiisiminilu inersimasunut atassuteqaatini aqqutigalugit attaveqartarpoq. Tamanna sinaakkutinut pilersitatsinnut, meeqqallu atugarissaarnissaannut sulisunut ullut tamaasa akisussaaffeqartunut annertuumik piunasaqaasiivoq.

Meeqqanut minnernut atassuteqaatit qanoq aalajangiisuutiginersut, allanngornernullu aamma eqqissisimannginnernut, ataqatigiinngitsunullu qanoq sunnertiatigisinnaatiginersut perorsaasutut sulininni takusinnaavara. Misilittakkat taakkua ulluunerani paaqqinnittarfinni sulisorpaalunnit aamma misilittagarineqarput. Taamaakkaluartoq ulluunerani paaqqinnittarfinni atugassarititaasut politikikkikkut eqqartorneqarpallaarneq ajortut misigisimavunga. Meeqqat ineriartornerat aamma siunissaat eqqartortorujussuusarpagut, meeqqalli toqqissisimanerinit, inersimasunullu tatiginninnerisa tunngavissinneqarfiini ulluunerani paaqqinnittarfinni sinaakkutit eqqartorpallaarneq ajorlutigit. Ulluunerani paaqqinnittarfinni sulisut takuneqanngitsutut misigisimasarlutik, meeqqallu toqqissisimanermik, allannguissutsimillu pisariaqartitsinerinit sulinermit atugassarititaasut tunniussiuminaatsitsisut ukiorpaat ingerlanerini oqariartuutiginiikuuaat.

Ataqatigiinnginneq meerarpassuit misigisaat ilungersunartuuvoq. Sulisut akulikitsumik allanngorarpata tamanna toqqissisimannginnermik pilersitsisinnaavoq, meeqqallu inersimasunut tatiginninniarnernut ajoqusiinnaalluni. Tamanna meeqqat minnerit ulluunerani paaqqinnittarfimmiikkunnaareerujussuarnernut kinguneqarsinnaavoq, kingusinnerusukkullu atualernalerunik atugarissaarnernut aamma piareersimanerinit sunniuteqarsinnaalluni. Meerartagut pitsaannerusunik tunngavissaqartikkusukkutsigit, pissutsit taakkua pimooruttariaqarpagut.

Ilutigisaanik ingerlalluartunik ulluunerani paaqqinnittarfippassuaqartoq, sulisullu tunniusimasut ullut tamaasa meeqqanut toqqissimanermik, ineriartuutaasunillu sinaakkuteqartitsisartut ilisimaarilluinnarpara. Taakkua assersuutissaqqissut akuersaarlugillu ilinniarfiggissavagut. Ilisimasat, misilittakkallu taakkua ataqatigiissillugit aqqissuutamik atorneqarnissaat qanoq qulakkiissaneripput, ulluuneranilu



paaqqinnittarfinnut akisussaaffik kommuniniinnerutillugu uagut Inatsisartutut, ulluunerani paaqqinnittarfiit sinaakkutit iluini qanoq pitsaanerusumik tapersersorsinnaanerigut apeqqutaaginnarpoq.

Tamanna tunuliaqutaralugu Demokraatit isumaqarput, meeqqat minnerit ulluunerani paaqqinnittarfinni toqqissisimanissaasa, atugarissaarnissaasalu qulakkeerneqarnissaanut politikikkut qanoq tapersiisinnaanerput pillugu ammasumik, akisussaassuseqartumillu eqqartuinissatsinnut piffissanngortoq. Tassunga atatillugu tulliuttumi apeqqutit eqqartorneqassasut kissaatiginarpoq:

- Ulluunerani paaqqinnittarfinni pingaartumik sulisut taarserarnerini aamma ilungersunartumik inissisimanerini meeqqat minnerit ulluinnarminni toqqissisimanermik, allanngujaassusermik, ataqatigiittumillu misiginissaannut Inatsisartutut qanoq qulakkeersinnaavarput?

- Ulluunerani paaqqinnittarfinni pitsaassuseq meeqqanut iluaqutissanngorlugu annertusarneqarniassammat, ulluunerani paaqqinnittarfinnit ingerlalluurtunit misilittakkat pitsaasut kommunit akimorlugit qanoq avitseqatigiissutigineqarnerusinnaappat, atorneqarnerullutillu?

- Ulluunerani paaqqinnittarfiit meeqqanut minnernut atugarissaarnermik pilersitsinissaminnut pisariaqartunik sinaakkuteqarnissaat qulakkeerumallugu, ilutigisaanillu kommunit akisussaaffii aamma nammineq aqutsineri ataqqillugit inatsisiliortutut sunik akisussaaffeqarpugut?

Ulluunerani paaqqinnittarfinni meeqqat minnerit toqqissisimanissaat, atugarissaarnissaallu qanoq pitsaanerpaamik qulakkeersinnaanerigut pillugit partiit sinnerisa, Naalakkersuisullu isumaat tusassallugit qilanaaraara.

Oqallilluarnissassinnik kissaappassi.